

14-bob. Soliq qarzini uzish to'g'risidagi talabnoma

115-modda. Soliqlarni to'lash bo'yicha majburiyatlarning bajarilishini ta'minlash

Soliq to'lash majburiyatiga ega bo'lgan soliq to'lovchi uni to'lashga doir to'lov topshiriqnomasini xizmat ko'rsatuvchi bankka, o'zining bank hisobvarag'ida pul mablag'lari bor-yo'qligidan qat'i nazar, ushbu Kodeksda belgilangan to'lov muddatidan kechiktirmasdan taqdim etishi shart.

Agar soliq to'lovchida to'lanmagan soliq qarzi mavjud bo'lsa, soliq organi unga soliqlarni to'lash muddati o'tganidan keyin uch kundan kechiktirmay soliq qarzini uzish to'g'risida talabnoma yuboradi.

116-modda. Soliq qarzini uzish to'g'risidagi talabnoma

Soliq to'lovchiga uning zimmasidagi soliq qarzi summasi to'g'risida, shuningdek shu qarz summasini belgilangan muddatda to'lash majburiyati haqida xabar yuborish soliq qarzini uzish to'g'risidagi talabnomadir.

Soliq qarzini uzish to'g'risidagi talabnoma soliq to'lovchi bo'lgan yuridik shaxsga yoki yakka tartibdagi tadbirkorga tadbirkorlik faoliyati bo'yicha unda ushbu Kodeksning **100-moddasida** nazarda tutilgan soliq qarzi yoki foizlar mavjud bo'lgan taqdirda yuboriladi.

Soliq to'lovchilarning konsolidasiyalashgan guruhi bo'yicha foyda solig'iga doir soliq qarzini uzish to'g'risidagi talabnoma ushbu soliq to'lovchilar konsolidasiyalashgan guruhining mas'ul ishtirokchisiga yuboriladi.

Soliq qarzini uzish to'g'risidagi talabnoma soliq to'lovchiga soliq haqidagi qonun hujjatlarini buzganlik uchun javobgarlikka tortilishidan qat'i nazar yuboriladi.

Soliq qarzini uzish to'g'risidagi talabnomada soliq bo'yicha qarz summasi, talabnoma yuborilayotgan paytga hisoblangan penyalar miqdori, jarimalar summasi, shuningdek soliq to'lovchi talablarni bajarmagan taqdirda, soliq qarzini undirish va soliq majburiyati bajarilishini ta'minlash bo'yicha ko'riladigan choralar haqidagi ma'lumotlar ko'rsatilishi kerak.

Soliq qarzini uzish to'g'risidagi talabnomaning shakli O'zbekiston Respublikasi Davlat soliq qo'mitasi tomonidan tasdiqlanadi.

Ushbu bobda nazarda tutilgan qoidalar soliq agentlariga yuboriladigan talabnomalarga ham tatbiq etiladi.

Ushbu Kodeksning 120-moddasi **sakkizinchi — o'ninchi qismlarida** va **122-moddasida** nazarda tutilgan hollarda soliq to'lovchining soliq qarzini uzish to'g'risidagi talabnoma boshqa shaxslarga yuborilishi mumkin. Bunday hollarda ushbu bobda nazarda tutilgan barcha qoidalar mazkur shaxslarga yuborilgan soliq qarzini uzish to'g'risidagi talabnomalarga ham tatbiq etiladi.

117-modda. Soliq qarzini uzish to'g'risidagi talabnomani yuborish tartibi va muddatlari

Soliq qarzini uzish to'g'risidagi talabnoma soliq to'lovchiga u hisobda turgan soliq organi tomonidan yuboriladi.

Soliq qarzini uzish to'g'risidagi talabnoma soliq to'lovchiga ushbu qarz aniqlangan kundan e'tiboran yoki soliq tekshiruvi natijalari bo'yicha aniqlangan soliq qarzini uzish to'g'risidagi qaror kuchga kirgan sanadan e'tiboran uch ish kunidan kechiktirmay yuborilishi kerak.

Ushbu Kodeks 116-moddasining **yettinchi** va **sakkizinchi qismlarida** nazarda tutilgan hollarda soliq qarzini uzish

to'g'risidagi talabnomalar boshqa shaxslarga ushbu moddaning **birinchi** va **ikkinchi qismlarida** nazarda tutilgan tartibda yuboriladi. Soliq qarzini uzish to'g'risidagi talabnoma olingan sanadan e'tiboran ko'rsatilgan boshqa shaxslar ushbu talabnomani bajarish qismida soliq qarziga ega bo'lgan soliq to'lovchilarga tenglashtiriladi.

118-modda. Soliq qarzini uzish to'g'risidagi talabnomani o'zgartirish

Agar soliq qarzini uzish to'g'risidagi talabnoma soliq to'lovchiga yuborilganidan keyin ushbu talabnomada ko'rsatilgan soliqlar bo'yicha qarz summasi, penyalar yoki soliq haqidagi qonun hujjatlarini buzganlik uchun jarimalar summasi o'zgarishiga olib kelgan holatlarni aniqlagan taqdirda, soliq organi ushbu soliq to'lovchiga soliq qarzini uzish to'g'risidagi aniqlashtirilgan talabnomani yuborishi yoxud ilgari yuborilgan talabnomani chaqirib olishi shart. Mazkur qoida soliq to'lovchi tomonidan soliq qarzini uzish to'g'risidagi talabnomada ko'rsatilgan soliq, penya yoki jarimalar bo'yicha qarzlari qisman to'langan hollarga tatbiq etilmaydi.

Soliq qarzini uzish to'g'risidagi aniqlashtirilgan talabnoma yoki ilgari yuborilgan talabnomaga doir chaqiruv xati soliq to'lovchiga ushbu moddaning **birinchi qismida** ko'rsatilgan o'zgarishlarga olib kelgan holatlar aniqlangan kundan e'tiboran uch kun ichida yuboriladi.

119-modda. Soliq qarzini uzish to'g'risidagi talabnomani bajarish

Soliq qarzini uzish to'g'risidagi talabnoma yuridik shaxs, shuningdek tadbirkorlik faoliyatiga doir qismi bo'yicha yakka tartibdagi tadbirkor tomonidan olingan kundan e'tiboran o'ttiz

kalendar kun ichida soliq qarzi to‘lanmagan taqdirda va agar ushbu Kodeksning 120 — 122-moddalarida nazarda tutilgan choralar qo‘llanishi natijasida soliq qarzi uzilmay qolaversa, soliq organlari undiruvni ushbu Kodeksning 123-124-moddalarida belgilangan tartibda soliq to‘lovchining mol-mulkiga qaratadi.